

Naalakkersuisut Inatsisartut suleriaasianni § 33 naapertorlugu aalajangiiffigisassatut siunnersuut tulluuttoq matumuuna saqqummiuppaat:

Pigisanik aalaakkaasunik arsaarinnissuteqartarnermi suleriaaseq pillugu Kalaallit Nunaannut inatsisip allanngortinneqarnissaanut Inatsimmut Namminersorlutik Oqartussat isumaqataanissaat pillugu Inatsisartut aalajangiiffigisassaattut siunnersuut (Arsaarinnissuteqartarnermut inatsisip nutaap malitsigisaanik sunniutaasunik allanngortitsineq)

(Isumaginninnermut, Suliffeqarnermut, Ilaqutariinnut Nunamullu Namminermut Naalakkersuisoq)

Tunngavilersuut

Inatsisissatut siunnersuummi Danmarkimi arsaarinnissuteqartarnek pillugu inatsisip nutaap ulloq 1. januar 2028-mi atuutilertussatut naatsorsuutigineqartup malitsigisaanik pigisanik aalaakkaasunik arsaarinnissuteqartarnermi suleriaaseq pillugu Kalaallit Nunaannut inatsimmik allanngortitsinissaq siunertarineqarpoq.

Inatsisitigut siunertamut arsaarinnissuteqarnissamut tunngavissaqartillugu, pigisanik aalaakkaasunik arsaarinnissuteqartarnermi suleriaaseq pillugu Kalaallit Nunaannut inatsit, suliaasaqarfinni Namminersorlutik Oqartussanit tiguneqanngitsuni naalagaaffimmi oqartussanut pigisanik aalaakkaasunik arsaarinnissuteqartarnermi suleriaaseqarnissaaannik aalajangersaavoq. Ullumikkut inatsit pigisanik aalaakkaasunik arsaarinnissuteqartarnermi suleriaaseq pillugu inatsimmut innersuussivoq. Inatsit arsaarinnissuteqartarnissamut tunngavigisassanik imaqtut, arsaarinnissuteqartarnermi suleriaaseq pineqartillugu, ulloq 1. januar 2028 aallarnerfigalugu arsaarinnissuteqartarnermut inatsimmut nutaamut innersuussissapput. Taamaattumik pigisanik aalaakkaasunik arsaarinnissuteqartarnermi suleriaaseq pillugu Kalaallit Nunaannut inatsimmik assingusumik allanngortitsisoqarnissaa pisariaqarpoq.

Tamanna tunngavigalugu siullertut siunnersuutigineqarpoq, inatsimmi § 2, imm. 1-imi innersuussineq, tamatuma kingorna Nunatsinni arsaarinnissuteqarnerit naalagaaffiup arsaarinnissuteqartarnerani piginnaatinneqartunit aqunneqartarnissaat, tak. pigisanik arsaarinnissuteqartarnermi suleriaatsimut inatsimmi § 4, arsaarinnissuteqartarnermut inatsimmi § 5, imm. 2-mut innersuussinertut allanngortinneqassasoq. Allanguutissatut siunnersuutip Nunatsinni inatsit malillugu arsaarinnissuteqartarnerit aamma siunissami Illoqarfinnut, Nunamut Angallassinermullu Ministereqarfimmiit piginnaatinneqarlutik atorfinitsinneqartunit, aamma arsaarinnissuteqarnissamut ataatsimiititaliat pillugit inatsimmi immikkoortoq 2 malillugu sulianik suliaqartunit, aqunneqartarnissaat kingunerissavaa.

Aappassaattut siunnersuutigineqarpoq, inatsimmi § 4, imm. 1-imi taaguut »naalagaaffiup arsaarinnissuteqartarneri«, arsaarinnissuteqarnissamut ataatsimiititaliap siulittaasua pillugu innersuussineq arsaarinnissuteqartarnermut inatsimmi § 5, imm. 2-mut allanngortinneqassasoq. Taaguutip »naalagaaffiup arsaarinnissuteqartarneri«, arsaarinnissuteqartarnermut sulianik suliaqartut pillugit, arsaarinnissuteqartarnermut inatsimmi nutaami oqartussanut malittarisassani ingerlateqqinneqannginnera siunnersuutip malitsigaa.

Inatsisitigut periaatsinik allannguinerit taamaallaat pineqarput, pigisat pillugit imarisaanut tunngassuteqanngitsut. Arsaarinnissuteqartarnermut ataatsimiititaliap katitigaanera, tassunga ilanngullugit Namminersorlutik Oqartussanit ilaasortat marluk aamma kommunalbestyrelsimit aallartitatut toqqarneqartut, inatsisissatut siunnersuummit kalluarneqanngilaq. Taamaalilluni aamma siunissami Illoqarfinnut, Nunamut Angallassinermullu Ministereqarfimmiit piginnaatinneqarlutik atorfinitsinneqartut tassaassapput, Nunatsinni arsaarinnissuteqarnissaq pillugu pilersinneqartunik arsaarinnissuteqarnissamut ataatsimiititaliamik aqutsisussat.

Inatsisip ulloq 1. januar 2028-mi, arsaarinnissuteqarnissamut inatsit nutaaq peqatigalugu, atuutilersinneqassasq siunnersuutigineqarpoq.

Naalakkersuisut missingiummut oqaaseqaataat

Naalakkersuisut Nunatsinni arsaarinnissuteqarnissamut inatsisitigut tunngaviit qaqugukkulluunniit ersarissuunissaat nutarteqqanissaallu pingaartippaat, taamaalilluni suliassa qarfinni, Namminersorlutik Oqartussanit tiguneqanngitsuni, naalagaaffimmi oqartussanit arsaarinnissuteqartarnermi suleriaaseq pillugu nalornissuteqalertoqannginniassammat. Naalakkersuisut maluginiarpaat, allannguutissatut siunnersuut taamaallaat inatsisitigut periaatsit pineqarmata, aamma allannguutit inatsiseqartitsinermi pissutsinik imaluunniit arsaarinnissuteqartarnermut ataatsimiititaliami Namminersorlutik Oqartussat kommunalbestyrelsillu inissisimanerannik allanngortitsisoqarneranik kinguneqanngitsoq.

Pisortanut aningaasaqarnikkut allaffissornikkullu kingunerisassat

Soqanngilaq

Namminersorlutik inuussutissarsiortunut aningaasaqarnikkut allaffissornikkullu kingunerisassat

Soqanngilaq

Innuttaasunut aningaasaqarnikkut allaffissornikkullu kingunerisassat

Soqanngilaq

Naligiissitaanermut tunngasutigut kingunerisassat

Soqanngilaq

Tusarniaaneq

Siunnersuut piffissami 21. april 2026-miit 20. maj 2026-mut Naalakkersuisut.gl-imi tusarniaanermut nittartakkami tamanut ammasumik tusarniaassutigineqarpoq.

Ilanngussat

1. Pigisanik aalaakkaasunik arsaarinnissuteqartarnermi suleriaaseq pillugu Kalaallit Nunaannut inatsisip allanngortinneqarnissaa pillugu Inatsimmut missingiummik eqikkaaneq
2. Pigisanik aalaakkaasunik arsaarinnissuteqartarnermi suleriaaseq pillugu Kalaallit Nunaannut inatsisip allanngortinneqarnissaa pillugu Inatsimmut missingiut (Arsaarinnissuteqartarnermut inatsisip nutaap malitsigisaanik sunniutaasunik allanngortitsineq)